

光緒山西通志

名宦錄九

錄一之九

山西通志第一百九

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

守令

順治康熙

邊大綬直隸任邱人順治八年任太原府知府有綜理才鉅

細畢舉當姜瓖初平撫循而綬父之不遺力閭閻寢有起色

蒞任五年號有治績

大綬在前明官米脂知縣嘗掘開賊窟墓歸里後為賊將所執會聞敗西竄至

書陽得賊者有虎口餘生記其事

韓昌穀禹城人順治元年以進士任太谷知縣甫下車即請

免協濟徐溝縣同戈驛馬及罷修學士公廩諸役縣編戶舊

七十一里亂後名存寔亡昌穀裁為四十二里徭賦乃均民

丁有兵死者皆削其籍剔奸蠹撫善良尤垂意學校課士面

爲甲乙如師訓弟子然遷兵部主事歷官荊州府知府縣民立祠祀之

牛應徵林縣進士知陽曲縣才猷精敏肆應不窮每大兵過頓置有法民獲安堵時晉初定軍丁驕悍不奉約束嚴治之無少貸猾吏奸胥畏如神明

楊三知字筠伯良鄉進士知榆次有膽畧氣節姜瓖之變與紳民誓守不渝宿城上者六月卒保全又捐俸三百金創建社學延師訓士歷升神木道死難恤贈如例

曹之賢遼東人文水知縣年少精敏剖決如流吏民畏服姜逆之亂其黨率兵來攻竭力捍禦城陷遇害

李昌汴豐縣人知興縣剛方有守姜逆之亂城陷被執賊索印昌汴力抗不少屈遂爲賊殺

贈按察司僉事祀忠烈祠

邵煥元字凌玉長垣進士知太原縣補葺城垣悉費以磚會  
姜瓖變起多方備禦賊不能拔

胡虞潢武陵進士任陽曲向以文章自命性清介甘淡泊偶  
鄉人來謁所贈多失望虞潢曰吾不能壞官箴爲若輩計耳  
秩滿遷行人東裝蕭然上官憐之

王家柱鍾祥人文水知縣申銷厯來逋賦修城垣新學宮日  
召諸生課文藝一時科第蔚興

邊大久任邱人由進士知徐溝縣清靜廉明優禮學校

張尙遼東籍浙江山陰人順治二年知平陽府揮霍長才精  
于吏治文移隨拆隨批吏不能點竄一字終甘肅巡撫

徐來麟奉天人順治五年知平陽府是年冬姜逆據大同以

叛遣其黨平德攻平陽來麟擐甲登城竭力捍禦獲全已而延安王老虎應逆渡河拔汾州復攻平陽來麟與王巡道無黨范參將永宗固守間出銳師擊之擒其將劉光明賊爲奪氣一夕昇雲梯潛過外濠謀登城城上矢石並發乃卻會官兵至始解圍走來麟率兵追之斬賊首劉四亨於峪口村餘眾悉潰時賊勢甚熾圍城七晝夜來麟能以孤城抗方張之焰卒獲底定論者皆多其績

趙昉字海曙山東武城人由進士知翼城縣慈祥練達饒有大略時東山邪教倡亂昉密請兵征勦殲其渠魁城獲全孟繼昌奉天人太平知縣清白自勵不愧古廉吏遷知甯羌州

田一冲內邱人曲沃知縣蒙城驛馬久累沃民慨然釐正之

民立碑記其事祀名宦

張士彪遯東人鄉甯知縣實心實政壹意於撫字遇事有膽略雖勢要無所阿承徵糧無額外之增處變多保全之恩祀名宦

張珥襄陵知縣政簡刑平作意學校歲己丑突遭寇警登城力拒事迫遂拔刀刎頸旋爲士民救甦稟稟有丈夫風何斯美陝西鎮番衛人以舉人知翼城縣姜逆之亂翼被兵尤數斯美與弟斯盛督鄉勇禦之六年七月賊眾數萬猝至圍縣城九晝夜斯美竭力捍禦勿遽中談笑自若人皆恃以無恐時平陽州縣獨翼城獲完斯美力也後遷開封府同知以去翼人建祠祀之弟斯盛有戰功又偕斯美殫力守城後以剿賊沒于陣翼人德之亦立廟祀

安應麟奉天人以貢知浮山縣姜瓖餘孽盤踞縣東南令千總秦文英鄉耆張三鳳入賊巢諭之降僞遊擊李元標等八百餘人胥散遣歸農又請豁荒糧數千石民漸蘇以其暇修縣治之前爲賊燬者

白珍奉天人以生員授翼城知縣初姜瓖之叛府屬州縣盡陷翼獨保全前令何斯美力也而誤以失守落職珍力爲白寃斯美得復任珍改令長興

侯世爵遼東人以貢知鄉甯縣姜逆之變賊黨衛敏破縣城據之焚掠甚慘世爵簡卒徒躬自督率誓不與賊俱立賊聞風震恐委城去世爵招撫流亡慰安反側閱二年民始有更生之樂比解組百姓多攀轅流涕

程衡奉天人令太平才識卓越力清積逋民不擾累行取御

史終湖廣參議道

胡秉忠襄陵知縣涖官勤慎操行廉潔視國如家不遺餘力後擢至諫垣猶惓惓以縣馬多設耗費無益爲慮特奏裁革有去思碑邑人高曦爲之記

胡獻瑤字心盡金州進士知翼城縣廉靜不擾修學宮擒逆盜息民安累官福建漳州知府

趙三長繁昌人以貢生知洪洞縣清儉自持利弊多所興除學宮公署城池橋隄盡力經營政事之暇留意古學士林咸推重之

盧易惠安進士知太平縣秉心豈弟緯以儒雅崇修廟學嘉惠士林升禮部主事出爲廣西提學道

楊名世商城舉人知浮山縣綜核敏給周知民情好微行每



夜出見縱飲博戲者輒拘治之盜賊屏息復大新學校立社館養士風氣因以丕變

徐兆極大興舉人知岳陽縣爲政寬仁留心文教寓撫字於催科助貧窮之婚葬民依之如父母以呈誤去官邑人李夢辰撰去思碑紀事甚詳

左斗光字映心膚施人以拔貢知翼城縣才猷練達操持清慎升許州知州

林天擎字玉礎奉天蓋州衛人順治二年以貢生知蒲州招集流亡寬省夫役京旅駐蒲者雲集供億調度尤具幹畧兵民胥頌之累官南贛巡撫

錢法裕遼東籍浙江仁和人蒲州知州才敏心恕政舉而民不擾姜逆之亂城陷被執不屈死

贈布政司參議

賜祭葬祀忠烈祠

馬翰如字伯顧隴州舉人知蒲州悃愾無華慈祥敷政申免河崩灘地豁除無地空糧州人頌之升戶部員外郎

陳素抱鐵嶺人順治三年知猗氏縣陳蠻子脅眾爲亂眾請討之素抱曰愚而詐人必不附其敗可立俟也何討爲已而果爲鄉勇所殺眾皆驚服迄姜逆之變陝督孟喬芳統兵來勦時素抱業遷潼關兵備道矣伺制府渡河哀懇曰猗氏某舊治民必不與賊爲亂卽或爲所脅亦日夜望球援若玉石不分恐非軍門安民至意因請以子佩從行渡河佩馳至猗號召士民迎王師制府慰勞甚至令軍中無得入猗境猗民至今頌之

黃家宰靖邊人以選貢知榮河縣勞心撫字清操始終如一  
士民視若慈母

張錫文字康侯江都人以選貢知榮河縣榮民加協濟州驛  
馬匹歲費三千餘金錫文極力申請得免風陵渡弓兵向以  
榮民派充亦請以工食銀解州而免應役百姓感之升邠州  
知州

鄭章閩縣進士知萬泉縣體恤民瘼力除雜派邑乘自兵燹  
後殘缺序次訂正志中所論地方利弊皆深切著明其他真  
學修城美政多端升眞定府同知

楊致祥遼東人順治五年任潞安府知府勇敢有爲姜逆之  
亂誓眾死守會叛丁張國威等陰通賊遂遇害  
贈太僕寺卿祀忠烈祠

銀器重錦州人順治中知潞安府兵革之後一意休養消弭  
亂萌全活甚眾升陝西漢羌道副使

高復興直隸成安人順治二年以貢知平順縣縣介萬山易  
潛孽匪復興廣招募勤訓練約束嚴明奸醜悞伏不敢動躬  
課農桑土闢氓聚盜胥革面後擢紹興府同知

李雲起昌黎進士知黎城縣姜逆之變大兵南下賊奔潰而  
土寇趙聯芳胡尙文煽亂雲起死焉

薛引隆韓城進士任壺關知縣飛蝗入境齋肅以禱雨降蝗  
不爲害後補星子卒于官

佟學詩遼陽人襄垣知縣姜逆之亂聞沈賊陷郡城亟趨救  
中途爲賊執不屈死之

靳秉璋甯晉進士知長治縣姜逆之亂沈賊陷城誘降不屈

死之

李允升漢軍旗人以貢生知長子縣姜逆之亂其黨沈夜半  
冒官軍入城允升爲所執抗節不屈死之

陳思忠遼陽人知屯留縣姜逆之亂爲沈賊所殺

王功成博平進士長治知縣樂易有容與民相安前朝宗民  
交易產業後有奉行太過者概收券坐爲佃人功成力請於  
當道巡撫白據以入告均給還業主愿遷江南鹽驛糧道  
于公允長治知縣明敏果決綽有風裁凡地方利害多所興  
除增建養濟院纂修邑乘尤其著者升刑部主事

張獻素遼陽人以貢生知長子縣嘗修廟學葺城垣升福甯  
知州去士民思之

徐大成潞城知縣修文廟立義學請蠲荒糧士民德之

薛起鳳韓城舉人黎城知縣有幹濟才嘗造耕織具教民請  
豁勘荒糧後改筠連卒於官

馮鏞江西永豐進士黎城知縣縣原設二十七里兵荒之後  
逃亡過半編審上請併爲十九里清慎廉勤擢戶部主事

朱輔秀水人貢生壺關知縣爲政慈祥興廢舉陞多善政升  
簡州知州

邱旦湖廣安陽人以貢生知平順縣性廉潔布袍蔬食一介  
不苟取每役出差遠近限以時日稍違卽重懲里甲安然無  
擾

黃廷柏遼東人順治五年任汾州府知府不毛舉細務而事  
晉綜理變逆亂以守城爲賊害

贈太僕寺卿祀忠烈祠雍正二年

御賜成仁取義匾額敬懸祠內

周召南遼陽人知汾州府時寇亂初定下車以招徠綏輯爲務而武斷舞文爲民害者搏擊之不遺力嘗下教屬邑徭賦有當開豁者有當均平者悉以告吾將爲民請命令下比屋歡呼泣任三年遷山西驛傳道汾人立碑道左誌遺愛焉  
遲日益廣甯右衛人監生順治二年知永甯州州當殘破之餘撫愛其民興利除弊民賴以甦尋擢山東昌府知府  
劉鳳翔利津人永甯知州政簡刑清值歲饑捐俸以賑累官武昌兵備道

劉奇遇濟陽人由助教知石樓縣渾朴純厚政簡刑清請蠲荒稅招撫逃民善政著績擢升揚州知府

王昌運沙河人以貢知甯鄉縣性坦率而執守殊確雖臨以

利害不動泣官時萑苻未靖一日數驚昌運整暇肅謚民安其業旋爲賊黨所害識者惜之

陳聖治錦州人知石樓縣才幹英敏氣度恢宏升浙江金衢道右參政

史具勳華陰人以進士知甯鄉縣有廉操慈祥愛民

張耀祖遼東人臨縣知縣姜逆之亂賊黨來攻耀祖曰此吾效命之秋也遂力守以死

贈按察司僉事祀忠烈祠

李國維滿洲人知臨縣廉靜愛民及去士民泣送於途立去思碑

王之儀字虞廷遼東廣甯人以任子知甯鄉縣時姜逆初平遭亡幾半之儀遍招徠且爲規畫生計民稍復業嘗大雨水



暴漲毀城垣十丈有奇之儀立淋潦督眾完築躬負土石城獲無圯水退築隄城外樹柳其上往來者胥頌焉尋遷海甯知州後以福州知府死耿逆之難

胡士廉嘉興人知臨縣廉介愛民以拂上官意罷歸民泣送之

周士章上元人以舉人知石樓縣石樓在萬山中土尤瘠重以闖寇姜逆後先肆虐衙蠹市魁多朋奸民日凋敝士章性涇潔不以家累自隨蒞任得主名按治之不少假條列利弊雖大吏不爲囁嚅平徭弭盜通商勸墾期年民始蘇簿書之暇嘯詠溪山在官三年憂歸士民謠誦

姚開先字堯門溇化人由拔貢生任臨縣知縣以清惠著聲後補四川鹽井經歷吳逆之變被執不屈死

袁仲選遼東人順治七年以貢知澤州姜逆之變州城爲賊  
據仲選泣任先遣牌具言大同破姜逆授首狀賊黨遁乃驅  
車徑入招流亡安反側閭井晏然及大兵至以澤從賊議  
屠之仲選哀請再四繼以泣尋復以百口保之主者曉澤人  
曰吾以爾使君免爾死爾其服使君教以無忘朝廷之德澤  
人歡呼曰不敢忘後遷潞安知府祠建澤城中祭祀至今不  
絕

李鴻勳字常六磁州進士順治四年知陽城縣敏斷有才略  
蝗入境齋沐虔禱蝗相抱僵死民以爲精誠所感

李向禹鐵嶺人陵川知縣姜逆之亂兵臨城下妻王氏謂向  
禹曰君職守土宜竭力報國慎無以家爲念向禹領之率家  
僮馳出王遂自縊二女暨婢從死城旋破賊執向禹誘之降

復休以兵卒不屈夫婦節義不愧前賢

劉廣國潛江進士知高平縣時姜逆初平高平雖壯邑凋瘵殊甚廣國首革賠補搜索諸弊正供外不費民一錢澤隸縣貢紳數殊夥輸納費不貲力詳直指獲題請減勸農桑修學宮循聲茂著卒於官邑人胥爲流涕

尚金章儀封進士知沁水縣請兵除賊召集流亡民獲安堵升刑部主事

黃國璨字觀虛郟城人以選貢任陵川縣招流亡勸開墾民無力治田及貧不能婚葬者量給資助之修聖廟設義學刻訓誡書禁役吏不得下鄉折獄明允積弊悉除士民歌恩不忘時稱良吏之最

陳國珍字鹿屏金壇人以副貢知陽城縣清慎慈祥愛民而

下士葺學宮纂邑乘立陽陵社以造多士升知太倉州蕭然就道有古琴鶴遺風民爲立去思碑

李繼白字夢沙臨漳人陽城知縣廉慈敏練縣自明末遭賊蹂躪屋廬非舊丁口不過二萬西南一帶民居尤寥寥闔里止百餘丁更有一里一人供役數年不節息者繼白日擊其困乃詳聞上憲得疏上免荒地數千頃民感其德爲立石以頌之

范繩祖高平知縣廉直剛斷能任大事察地方利害興除之均徭役革衙蠶完先師廟大工建城隍廟繕城築隄創祠修署治行爲一時最

胡文燭字德輝漢軍旗人由貢生授昌平知州順治七年擢知大同府時姜逆初平移府治陽和事事同草創文燭通達

政體精於吏事日侍制府佟惟瞻商榷指畫爲經久計豁荒糧籌經費清訟獄理郵驛絕苞苴風紀肅然手輯雲中郡志十四卷未幾升河南兵備副使

榮爾奇德州進士由冀南道左遷渾源州知州剛毅明達政簡刑清士民甚愛之姜逆之變抗節守城死祀名宦祠

卽永清廣甯人順治六年以監生知渾源州時姜逆初平永清首立義冢瘞殘骸乃招流亡督開墾詳豁逋賦一萬餘兩販易者給母錢俾通貨器士民始有起色遷汾州知府去民爲立祠祀之

王度山東人順治三年以進士任大同縣知縣有能聲姜逆之亂道府符篆多失獨縣印存親王統師來討平西將軍印時猶未頒布檄徵餉調兵緊縣印是賴度善招撫懷仁諸地

以次定督運勸輸搜馬擒寇胥有功叛黨造度手書投營前  
王知其樸忠出書示之度勃怒檄詆賊家人九口胥爲賊殺  
事平議叙官至太常寺卿

顏永錫大興進士知山陰縣時田荒逋積乃招集流亡詳豁  
正賦一千九百餘兩加意作新殘民蘇息以治最升去士民  
德之

杜汝浮永年人以貢生知廣靈縣賦性耿介剛方不阿堅守  
清操疏水自甘卒於官祀名宦祠

羅森大興進士知靈邱縣下車問疾苦鋤秦強興教化簡刑  
訟招流移補驛騎勸耕作慈恕明斷遇事迎刃而理值姜逆  
變諸郡邑皆破獨嬰城固守殺賊使以應英王守將某陰通  
賊憚森不敢遽發會援師集城賴以全

范發愚河南進士知廣靈縣姜逆據大同渾源逆黨朱廷糾集千餘人剽掠村堡邑奸民李青許發旺等勾連賊眾圍縣城發愚以大義勸諭士民晝夜捍禦與城存亡仍調以鄉義勇救援潛緝壯士赴英王麾下請兵勦滅之賊遂平歷升江西道祀名宦祠

宋起鳳字紫庭滄州人以副貢知靈邱縣靈邱經闖寇繼以姜變民散田蕪賦役缺正額者以萬計起鳳力請蠲除其無主者流民漸復業起鳳復時詣田間課之寢有起色及解組攀轅臥轍者踵相接焉

孔化鳳山東恩縣人由投貢知大同縣性廉明查廢產清隱占讞獄平恕催徵有方胥役不敢犯科而閭閻德之至修廟學建橋梁一時政績多可紀述

王家珍遼東人順治五年任朔州知州十二月死姜逆之亂家珍有幹略泣任不半期竟以節殉識者惜之

侯樹屏邵陽舉人順治十三年知朔州嘗修廟學置祭器築丁祭考並修州志升廬州府同知去

徐明弼蕪湖進士知馬邑縣姜逆之變大同州縣多爲賊脅降王師旣至弼挺身扣壘王優禮之及大兵西指下朔州而馬邑免於屠戮皆明弼保全之力以卓異行取戶部主事累官陝西督學道

趙映斗遷安進士知馬邑縣勤儉率俗布袍草履淡如也至若嚴猾胥侵糧之禁却園戶日蔬之供寬猛得宜故民不擾而事以集因里誤去士民惜之

宋德芳開州人順治二年以副貢任遼州知州設義學教紡



織修公廨興廢舉墜綽有吏才

陳儲賢遼陽人知榆社縣當定鼎之初能以慈愛撫民政簡刑清民祀之三立祠

王來舉蓋州人任榆社時值兵燹之餘竭力撫綏凡可爲民造福者皆愷切上陳今祀三立祠其後以賢能稱者有王家桂中部人翁九鼎崇安人並以舉人任

王國棟鐵嶺人順治七年以貢士知沁州時變逆亂後念民疾苦履田畝覈勘得無主荒地若干沒水石荒地若干具詳撫臣題給糧銀七千餘兩由是民免追呼其後荒地以次開墾國賦仍無缺額沁人德之

程憲字章世錦州人以蔭累官沁州知州爲政明敏銳意興除創建義倉以備荒歉修築州城以嚴守禦營建石隄以捍

山潦沁民實永賴焉官至湖南按察使

李芳莎永年人順治元年由拔貢令武鄉清節自持發奸摘伏如神暇則以詩歌自娛地方利弊亦往往託之於詩當時以爲詩史嘗修州志擢永州同知去

劉璇永年人以貢生任沁源縣知縣沁源明季稱盜藪民多習鬪健訐訟璇教以禮讓招逋撫羸著循良聲後以鄖陽同知死吳逆之難

張一龍奉天錦州人以貢生知沁源縣姜逆之亂太行縣霍間多爲賊脅及大兵進剿主者議縣人從逆罪一龍涕泣固爭願以百口保其無他主者感動下令軍士無得妄殺縣人始獲保聚後遷郴州知州以去遮道送者趾相屬已復建祠肖像以祀焉

羅三重遼陽人以蔭生知武鄉縣值姜瓖作亂所在土賊竊發三重多方綏輯民以無擾兵荒之後士多廢業加意培植撥官地置學田爲貧士膏火婚喪之需學校至今賴之與前令劉遷黃元會同建祠祀名曰三公祠

魏一龍新安舉人順治二年任平定州知州撫凋殘表忠義立物本社課文造士旣去民思其德祀湧泉亭後知忻州亦多惠政

陳起潛奉天廣甯人以貢生知平定州減刑輕稅剔弊釐奸恤苦賑貧重學造士嘗著平定民隱詞十首情詞悱惻雖鄭俠之鬪流民蔑以過之州人建祠肖像祀焉

潘朝選奉天人順治二年知孟縣甫歲餘循聲上徹擢京秩去累官直隸巡撫

高象樞遼東人由貢生知壽陽縣有幹濟才時方多事守城禦寇屹然保障民德之仕至淮安府知府

何顯祖順治間任陽曲縣主簿署忻州知州事有幹濟聲姜逆之亂督糧於鄉中塗遇賊被害

贈太原衛左衛經歷祀忠烈祠

文壁星字映宿南和人順治元年以歲貢知定襄縣叛將柳同春及五臺賊張五桂攻城勵眾奮力死守城得不陷隨擢太原中路同知士民灑淚送之

祝文光遼東人定襄知縣有廉聲姜逆之亂死於難

劉正字方若直隸任邱人順治初以選貢生授代州知州士有問業者親課督不懈州人某爲仇家所訐禍不測力白其枉得釋懷數百金以謝峻拒之姜逆變賊數萬攻城者百曰

正內戢外禦比敬謹親王至圍始解或指聚落爲賊黨抗聲折之密令具牛酒犒師胥獲免遷太原府同知領代州如故尋改商州知州以去

季子和順天大興人順治初由舉人任五臺縣時定鼎之始奸宄相煽亂民心猶懷疑懼子和加意撫摩單騎徧歷各鄉與父老子弟相見諭以天命有歸海內卽日太平宜安居樂生務農服賈勿荒本業暇則進諸生講說經義不倦尋擢河南道監察御史士民惜之爲立生祠於文昌宮內

吳琮浙江紹興人入遼東籍由貢生任五臺縣姜瓖反晉陽以北五十餘城半爲賊黨攻據代州人劉遷受瓖僞職聚眾應之五臺土匪高山等亦聚眾剽掠合縣大亂琮與同城各官誓以死守歃血與紳矜百姓盟已而賊眾蟻聚攻城琮率

眾晝夜守禦相機出城擊賊家丁吳虎吳有功皆戰死踰年  
姜瓖破敗餘賊悉遁五臺據寶村爲巢穴攻城愈急幾破者  
數矣瓖灑泣誓眾與城存亡眾皆感激死鬪賊攻圍一年竟  
不能下會宣府總兵李延壽襲破寶村賊巢賊乃潰散城獲  
全南門墜城有斗室琮守城時坐臥處也事平未邀薦擢士  
民惜之

范印心河內進士知崞縣廉潔克勤厥職首請驛馬之牧于  
民者還諸官積困以甦姜逆亂五臺甯武士匪乘間竊發曠  
聚數千時時出沒縣境印心召募鄉勇千人訓習有法號令  
嚴明常以身率先出行剿殺賊不敢犯事平又請蠲逋賦贖  
俘掠婦女民甚德之累官河東分守道祀太原府名宦祠  
楊澤武功進士補崞縣知縣姜逆初平田野荒蕪人民散匿

澤悉力休養並得復業保聚捐俸繕修城垣文廟及各處橋梁煥然改觀一切行戶郵遞賦役之爲民累者盡行革除殲木虎山羣盜計擒原平賊魁趙某巡撫馬公許爲治狀第一  
醇民立碑頌德云

崔尙質遼東人繁峙知縣治行最一時姜逆之亂賊劉遷聚黨來攻尙質登城設守禦具旣而城潰令家人自焚乃殉城張志高遼陽人六年任繁峙值寇變初靖城垣頽圯并廬邱墟架木殘廟之中侍從皆露立志高設法經營不忍盡民之力三年後堂廡衙舍規模乃備敷政臨民有所憑依云  
戴聖字爾玉玉田進士知繁峙縣簡以臨民征輸有法廟學燬于寇以次修復之集生徒講授文教漸興內擢行人司徐效奇奉天人順治四年知保德州己丑牛化贊叛被執不

屈死二子亦同時被害

安世鼎字鑄九遼東人以貢生授保德知州時牛逆方據城世鼎隨營招輯鄉民城下之日請於將兵者止戮賊魁民得全活旋遭凶荒仍請賑濟瘡痍始有起色凡從逆者之產例入官屢奉嚴查世鼎以賊從外遁入據攘奪民居不宜重累地方力爭得寢升江西南昌道士民焚香哭送

孟熊臣字輔昌遼東人以蔭除保德知州蒞任五載不攜妻孥嘗輦致家貲爲州公費厚重簡默優游坐理革除夙爲民害者八款立石衙前升汀州知府去之日州人泣送祀名宦楊廷標字捷軒歷城人以貢生繼安任時大兵雲集軍中應用設法湊辦事集而民不知擾歲饑捐俸施粥全活甚眾繼任者爲吳健字乾公甯夏舉人亦以廉惠稱



田思孔字印尼鐵嶺人順治末知保德州慈愛廉能免稅招商力圖生聚遇荒賑濟存活萬餘人秩滿升象州知州百姓遮道攀轅樹碑東關以志去思

鄒蘊賢遼東人順治十年知解州時當定鼎之初周察未復蘊賢不喜爲苛刻輕徭緩徵喚休撫摩吏民安之而堅確有守利弊當興除雖有力者撼之不爲動未幾瘡痍漸起閭里改觀後遷蘇州知府以去州人建祠祀之

劉之屏萬全衛人順治四年以進士任夏縣知縣撫字心勞人稱劉父姜逆之亂之屏登陴督守手刃二賊力竭死於城上

贈按察司僉事蔭子入監祀忠烈祠

劉禮典東阿人以貢生知安邑縣實心任事厚重少文政尙

仁慈人稱長者其後有良鄉王秉樞亦由貢生任以清慎著  
遲日異廣南貢生知夏縣時姜逆初平流移未復而餘孽猶  
潛伏伺釁日異哀前令劉之屏以無備殉乃繕治城堡集鄉  
勇勤訓練賊聞竊發輒躬督以往殄滅無遺種乃止而脅從  
者又勤撫恤之俾胥復業復力請蠲積逋夏人始蘇及去民  
思之久而弗衰

鄭四端陳留進士知夏縣性嚴重訾笑不苟而諮訪民疾苦  
殊詳懇已有諧媚者微詞諷刺俾自遠夏故多賢令劉遲最  
著至嚴明正直則推四端爲第一及去士民閉門留之累日  
乃能出境

王自修字闇卿新鄉貢生知芮城縣改修學宮申豁汾西協  
馬之累升主事祀卜子書院

聶源萬全衛人順治二年以舉人知絳州才識明敏判斷如流崇文課士振興學校

單惺聚強舉人知絳州恭謹簡默旁竇盡杜升工部員外郎去其繼任者有薛世望江陵人以慈惠稱王琦大興人廉幹有政聲

楊之柄良鄉舉人稷山知縣精明有遠略剖決如流時值流亡初復招徠撫綏井井有條復請上臺疏免荒地糧若干稷人賴之以甦升戶部主事祀名宦

張文德遼東人知垣曲縣刑清政簡潔已愛民卒于官士民感涕立祠祀之

李榮宗襄縣進士繼張任妻逆之亂城陷被執罵賊死  
贈按察司僉事蔭子入監祀忠烈祠

鍾萬齡奉天貢生知聞喜縣招集流亡掩捕賊盜境內安堵  
孟泰遼東貢生知河津縣長於騎射靖寇有功升歸州知州  
繼任爲王應泰臨潁人有廉平稱地方賴其休養以憂去  
邵起鳳正藍旗人以貢知垣曲縣姜逆之變賊黨破縣城盤  
踞垂一年民日夜望解倒懸及大兵至或議屠戮起鳳時未  
蒞任適在軍亟請於主者曰垣人從賊乃迫於不得已非其  
本心今奉辭伐罪正宜開釋無辜與之更始若肆爲殺戮殊  
非國家用民至意且有地無人亦何需此曠土爲主者因下  
令妄戮平民者按軍法入境市不易肆垣人胥安堵無恙  
張拱巖完縣人以恩貢知稷山縣時土寇蜂起邑民逃竄拱  
端單騎就在招徠士民練鄉兵數百極力擒捕一時盜寇屏  
跡百姓至今感其捍禦之恩云

姚延啟烏程進士稷山知縣博學多才虛懷善下敦行誼崇節孝豪橫蠹役一時屏跡兵燹後士不知學立采蘭社課之多所成就尋擢工科給事中士民立碑東郭外知縣舉際有記

秦樂德三原進士知垣曲縣清廉仁恕時寇氛初靖力請蠲免荒糧以蘇民困流離復業民深感之施名宦

李如蘭字九畹武陟進士知聞喜縣精明強幹時稱神君甫下車卽以興作爲任修理學宮重建衙署並城樓其他祠宇多所增葺於地方事無不綜理精密升主事去

董爾性字聖功洛陽人以貢生知垣曲縣剔奸釐弊凡利民者知無不爲城東北龍祠下有滴水泉歲時禱雨所也爾性相地勢捐俸開渠引以溉田土人名曰董公渠又於舜井傍

贊池豬水以時蓄洩旁地遂成沃壤民肖像祀焉

汪自潤東流人由貢生知絳縣兵燹之後民困未甦自潤多方撫循催科不擾盜賊潛迹在官七年如一日未嘗少懈士民感其德欲爲立生祠自潤堅拒之乃相率建觀音廟於東關而位其旁以祀

王添貴遼陽人順治六年以貢生授隰州知州姜逆之變土賊蜂起隰在萬山中害尤劇添貴從大兵徑擣巢穴賊黨懼潰走悉諭降之令釋戈歸農旣蒞任輯流亡修城垣興學校胥有政績而常率兵圍剿時將領以居民從賊議屠城添貴懇請始獲免隰人至今德之

郭瑄沙河人以貢知蒲縣蒲小邑俗頗椎魯舞文吏多擅作威福以故逃亡日積瑄蒞任風采凜然人望而知畏性通敏

里閭利病周知無遺凡有興舉口勅手揮左右奉成命無敢以一言進者或用微詞餽之輒大聲呵曰汝輩第奉行文書何得與民事聞者胥胥咋舌退當時以鐵耳稱之後遷徽州府通判

王永祚奉天杏山人由貢生知蒲縣公廉寬惠不以察察爲明賑貧恤孤興學育才至今有餘思焉

張之鳳華陰舉人繼王任振作有爲教紡織勤訓課恩威並用士民懷之

吳興祚遼東清河人以貢生知大甯縣大甯介萬山流寇蹂躪後民多遁土田率蕪穢不治學宮幾絕士跡興祚約束吏胥俾無得擾民力革宿弊捐俸修廟學獎厲文士餽不足者胥飲之再期民多復業里閭寢聞絃誦聲後以治行報最遷

官至兩廣總督

閩承儒遼東人順治六年由貢生知霍州有惠政州人建生祠祀之

王來覲遼東人嘗任河南分守道降霍州知州姜逆之亂以霍爲南北孔道攻尤力來覲督兵以守城陷血戰死祀忠烈祠

秦加兆奉天人順治元年任趙城縣知縣肅胥役平差徭招撫流亡開南路以廣通衢又設學田修中鎮廟暨趙簡子祠循聲懋著擢平陽知府後歷江西左布政祀名宦

張暉趙州舉人知靈石縣請設驛遞以甦民困昌明正學以端士習有循吏稱

田起龍奉天人靈石知縣剔弊除奸恤民愛士大兵經過調



御多方築隄護城修橋通濟士民頌之

安錫祚章邱進士知靈石縣體恤民情周知疾苦嚴城守清保甲除火耗均徭役蠲贖緩捐俸葺學宮暨文昌諸正祀尤勤於課士以暇訂修志乘有神名教職滿遷去邑人思之

右順治年一百五十人

又六人附見

甘國基正藍旗漢軍人康熙二十七年知太原府性敏果綜練庶務上官倚之如左右手獄以片言折之情偽如指掌市懸衛蠶胥斂迹而不專以擊斷爲能嘗捐俸覓乳媪育嬰兒失養者又設義冢瘞枯骨在任七年賢聲懋著

王帷籌華州舉人任祁縣創義學肄書課藝祁水爲豪強所據民不得灌溉毀其壩俾無敢壅以自利解組歸民爲立祠趙吉士字天羽休甯舉人知交城縣交城居萬山中產馬絕

有力又饒灌木時民間畜馬有禁上官廢南堡村木廠許治  
河市賣由是利爲文水商民所奪交人重困往往去爲盜吉  
士旣到官會年餓申明乘斯保甲團練之法躬詣河北都行  
荒政相度蹊徑通塞村砦近遠盡知羣盜出沒所在乃同守  
備姚順等統步騎兵四百進入兩壺盧川分搜巢窟獲魁渠  
二十二人餘或降或自剄召山民不作賊者資以羊酒其素  
不當夫徭者編其籍入都圖事詳夏駟所撰交山平寇記於  
是修圖經立倉廩定軍營課民種柳鑿山通龍門渠以溉田  
遂力請復南堡村木廠秣善馬於驛撫臣上其狀入爲戶部  
山西司主事遷戶科給事中卒

趙良璧奉天開原人以蔭生知徐溝縣邑當孔道供億煩重  
良璧送迎餽餉胥謝絕蒞政五年寬嚴並濟以清源盜案累

誤去後歷西安府同知猶念徐溝科第少札召紳士斥四百金俾築文峰邑東南云

孫閔達江南通州進士知太原縣性簡潔政先慈恕不輕敲扑犯者至死胥咸頌不輟立義學刊省身錄功過格感應篇梗贊興起後以病歸行李蕭然一如始至

儲方慶宜興進士知清源縣時軍興辦供億又山水數漲爲城害歲修白石堰禦之吏緣爲姦利民滋擾方慶性介潔糗糧芻藁之費胥假貸以辦不徵民間一錢趙成田茂諸逋賦暨貧不能娶者多捐俸伏佐之復以民餽運不給因停修堰之役禱白龍神祈默佑明年春山水改道而南去城十里喜曰吾可保清邑數十年無患矣乃移建白龍神廟以鎮之月集諸生較藝後多成名者三年應博學宏詞試去猶以城東

南閩諸湖水利非民利經畫不克展爲憾云

戴夢熊浙江浦江人知陽曲縣政持大體才能肆應嘗刊  
聖諭講明鄉約創設義學散紡車以教績織巡阡陌以勸樹  
藝凡利弊之當興革者知無不爲爲無不盡如嚴行保甲預  
儲賑糧院司皆下其事於各州縣爲永式焉又以其暇集文  
士纂修志乘寶賢堂帖亂後散佚一日訪得於民間水竇爲  
補刻五十餘石名蹟復完云

王亦宣漢軍正紅旗人榆次知縣縣編戶七十餘里舊設總  
理十人凡縣官公私所需皆由總理科之於民恣爲魚肉嗚  
謙驛爲京省要衝遇軍事始佐以民力久之吏緣爲奸利農  
家至不敢蓄車牛亦宣至廉其弊悉革之民慶更生居歲餘  
令行法立豪猾遁迹蒲博械鬪之風不禁而自戢獄犴幾空

及去縣人勒其德政於石

唐廉四川人以舉人知陽曲縣性儉樸衣布衣不曲事上官歲時儀節胥絕尋中吏議罷歸未幾再起知縣事卒不少屈接紳士以禮而請託則堅拒弗許民以事至引至堂前語聲不厭而執法者按治不少貸馭吏嚴而有恩前後蒞任凡七年解組時敝車羸馬行李蕭然人皆謂適符其名云

王嘉謨浙江會稽人由貢生知徐溝縣仁慈廉靜實政實心葺學宮繕城垣設義學修社倉有功地方

袁國梓江南華亭人工文章康熙十二年以進士知平陽府早起卽據堂治文書端嚴如神至日昃不懈事至出片語裁之胥中肯綮衙蠹市魁懼不敢肆當時號才吏焉

石文晟奉天人知平陽府時歲饑會有造船運米役明年復

派草三十五萬束轉輸大同文晟始具詳請賑謂嗷嗷待哺刻不容緩所有借給米石祈速爲接濟又言設廠煮粥止便少壯能就食者至老病婦孺或且坐而待斃祈令散賑官親歷山僻按戶查給繼而具詳請免輸草謂大同相距約一千六百里有奇人負不過五六十斤日行不過六七十里以三十五萬草束計之需夫七萬需時兩月往返工資何可勝計若令折價採買則大同必且居爲奇貨不厭不止而平陽當凶荒後造船禹門運米河南其偏苦亦已甚矣祈令太原就近收買庶勞逸得平而殘黎可起詳上胥獲允行

王輔奉天人知平陽府有幹略尤能以嚴重鎮人心三十四年平陽地大震官署民舍胥圮火數起黠暴復乘間剽掠輔日夜巡關擒其不法者寘重典不逞始斂迹死者給以棺

不足繼以席又不足爲大家數十男女各以類從俾無至暴  
露復榜示能建置堵楹予金若干它郡邑人能占籍曠地亦  
胥爲永業榜下聞者踴躍赴命今城內大中樓南居民鱗次  
人猶稱王公街

劉榮字青岑山東進士知平陽府值地震之後瘡痍未起加  
意周恤歲歉煮粥賑饑修葺文廟整理樂器重建鼓樓開拓  
試院纂修三十四屬府志在任吏惕民懷善政不可勝舉後  
升江西提刑士民泣送之

李丕先字有開長山進士康熙元年知岳陽縣鼓舞學校勸  
課農桑升建昌府同知岳民感德立生祠祀之

張聯箕益都進士知鄉甯縣在官招撫流亡修廢舉墜建城  
隄以防水患開煤路以裕民財纂修邑志於山川形勢地方

生計言之甚詳

謝國保襄陵知縣詳慎廉明寬嚴適宜除巨憝革雜派闔邑賴以安堵至作育學校吏部許公等皆所得之士爲國初循良第一

蔣鳴龍浙江建德人以拔貢知汾西縣汾西土高燥田多苦旱又協濟仁義驛馬芻牧得出里甲走驛供役者趾相續而驛舍燬於闖非假館無所棲息鳴龍謂驛傳自有正額革民養馬費還之官建馬廠於驛堂室庖溷胥具時相度汾濱潞潒平舊渠又築隄一於前加樓村潞渠三於福珠衛家灘後團柏村溉田頗廣民至今思之

邱士璠漳浦舉人浮山知縣聽斷明決有訟者令其自拘民得不擾爲立祠祀之



潘廷侯奉天甯遠舉人浮山知縣涖政嚴明奸宄屏跡深知稼穡艱難親履阡陌勸課農桑創建南門外溝橋北門外廣濟橋以利涉並纂修邑乘

何焯然臨海舉人太平知縣爲政以惠和稱蝗不入境禾生三穗修文中子祠有振興文教之功

陳應富字方穀遼東舉人翼城知縣明達吏治甫下車卽詢民間利弊毅然以興剔爲己任且雅重斯文士民並懷其惠允稱良吏焉

吳軫字星子容縣進士知太平縣諳練精敏能先其大者縣城自明季號雄峙寢壞于雨軫力爲修葺復其舊廟學衙署賓賓之館麗譙之樓以次具舉在任九年吏民畏愛以治行擢德州知州

王璆字紫垣真定人知翼城縣廉正剛果善治盜不避權勢  
升肇慶同知

司鉉字鼎臣甯晉進士翼城知縣寬宏廉靜實心愛民兼攝  
曲沃亦有樂只之頌遷吏部主事民遮道攀轅留三日乃去  
王桃一彰德舉人知浮山縣浮山丁糧十年例一辦公務費  
踰正額又商人高鹽價和以沙土民多坐私鹽論罪槐一胥  
釐正之設義學課秀民許訟令自拘立剖曲直胥役終歲不  
一出縣門三署隣家胥有能聲泣任五年以老請歸浮山人  
時誦遺愛焉

王承露益都進士知臨汾縣性剛正事上官以禮進見輒抗  
論是非疊疊千百言不止或尤其強項屹然自若雅有吏材  
遇事機張理解胥吏舞文洞鑿本末不少蔽臨汾故繁衝正

供外取於民者累累一日檢籍太息言經費自有定制何重困赤子爲胥裁去之民始知曩者之爲中飽也後行取戶曹以去

賈璋靜海衛進士繼王任慈祥愛民鎮靜率物廉潔自持王以才能著稱政績藉甚璋一循其治不事紛更民甚德之行取部曹後爲本省學道

秦棠奉天人知臨汾縣實心愛民以清潔自勵積弊革除殆盡以他事降調百姓叩閭遞陳治績特擢太原知府民懇留改本府知府

馮勸諸暨舉人知襄陵縣和易近人暇輒與諸生講學課藝文章政事獨擅一時三十年行取御史特疏免府屬挽運米豆之役至今士民戴德

鄧原京山人洪洞知縣節財愛民不事敲朴一時有召杜之稱立社課士邑中科第蟬聯不絕皆其力也

潘鍾字就亭崇安進士知曲沃縣幕中無客能儉以成廉下車拔諸生五人後胥列甲乙榜創曲沃志有體裁嘗建節烈祠表烈婦劉小件閭緝緝守伐石樹黨冰壑墓泣任十四年行取仕至通政司參議

李清鎧正黃旗人以官監知太平縣清靜不撓時巡阡陌勸農桑訟期得情而止久之獄寢息盜賊潛踪在任六年人懷之

靳讓尉氏進士知汾西縣潔己愛民薄稅省刑捐俸新學宮修城垣俱煥然一新歲饑設法無恤民需實惠歷官五載善政班班行取御史

惲東生武進人以進士任襄陵知縣重建明倫堂鎮汾樓並修南郭長隄士民稱之

王助陞萊陽舉人岳陽知縣涖任時適值丁戊奇荒之歲多方撫字殘黎得以再生仁風善政至今稱頌行取刑部主事宋繼均襄陵知縣剛方明決釐弊剔奸學宮汾隄皆其修葺歷署數邑有暮夜卻金之廉

宮懋言字書升泰州進士知洪洞縣在任八載政多循聲乙未歲承辦軍需於民絲毫無累設立書院與諸生講解六經旁及詩歌迄今稱詩學之宗其決獄也燭照數計若逆知而預爲之備吏民無不懽服升本府通判

林世炳字蔚巖澄海舉人令翼城居官廉幹精敏建修四門城樓創紹文書院於潞公軒側政餘與諸生講學其中媿媿

不倦丁內艱去

孫渭字笠菴仁和人由兵馬司指揮改汾西知縣有惠政民為樹碑於僧念鎮沈甯字心涯石門進士亦以循稱縣人侯七乘為撰愛民頌推揚甚至後由行取累遷郎中出知汾州府

薛塏山東濱州進士知洪洞縣和平慈祥歲辛丑饑煮粥賑之全活無算

陸張烈字昂千海鹽進士知浮山縣才智明達沈毅有為莅任七年百廢具興卓有政聲康熙六十年奇荒勸紳士捐米二千石會同在城隍廟散給并令里民具報實在不能具火者計大小口按五日一散是時隣邑逃荒接踵獨浮邑百姓無流離之苦全活甚眾時有豪棍挾官害民稟府調兵擒治

民得以安立有生祠行取吏部主事歷官至廣東鹽法道  
張學都宛平人太平知縣催科有法聽訟無私增弟子員額  
數置學田建書院修蜡廟己亥庚子歲饑學都悉出家財救  
濟于未奉文之前赴調西陲猶託囑家人加意周恤其母在  
署至脫簪珥以佐施藥施棺之用在任八載邑人謳思之  
許嗣興奉天開原人康熙十一年任蒲州知州葺廟學復河  
中書院治彙猾爲民害者胥斂迹時檄民運米西安屢詳請  
運至陝界止獲允客兵往返胥悞伏不敢肆民德之後歷官  
福建巡撫祀名宦

陳觀聖字幼以武陵進士康熙二年知榮河縣催科不擾逃  
亡盡復民以訟至卽令自拘被告者井里宴然卒歲不見胥  
役繼令者有遼陽李長庚以舉人任嘗輯縣志其催科聽訟

一如陳云

陳見智曲阜進士知萬泉縣清白自矢凡士子以文事質者  
藹然如家人父子於窮民撫恤百方尤以無事處事厯官金  
華知府

趙德順德舉人知荷氏縣性廉勤編審平允催科有法嚴於  
治盜又念賄爲盜源痛懲之遊手斂戢持身以禮尤喜獎掖  
人材以卓異升鄧州知州

丁珩宿州人萬泉知縣慈以撫眾嚴以馭下值軍需告急民  
無追呼之擾編審戶口任民自便閩邑感之累官漢興僉事  
道

瞿亮邦字敬六常熟人知萬泉縣徵收公賦不事朴筭裁革  
雜派猾吏斂迹縣自辛酉後二十餘年科名闕寂加意振興



廣建義學刊有汾陰課士錄聽斷詳慎羣服其公而狼償孩  
命一事尤爲人所傳述云在任十四年升中書科中書

陶自悅字艾圃武進進士知猗氏縣性淳厚深於經學蒞政  
寬以字羸弱嚴以治豪猾有循吏風雅工制義日進邑中知  
名士口授指畫諄復不少倦猗氏故多英雋得自悅倡導彌  
淬厲奮躍一時科第甲山右久之遷澤州知州治澤如猗氏  
澤人之感頌也亦如猗氏嘗輯州志指要精覈在武功吉水  
二志問後以病請告歸

陳騰章廣西賀縣舉人初令浙江康熙甲午補猗氏令慈惠  
廉平簡靜不擾時用師哈密軍需車仗鞍履口袋等項催繳  
旁午騰章設法備辦不責於里甲民胥德之後卒於官貧不  
能葬賴同官資助越二年始克歸里

梁鳳翔咸甯人康熙癸丑進士累官潞安知府董中飽禁私派以足疾乞歸潞人懷之

金光昊字侶樵全椒人康熙五年以舉人知長子縣性嚴正不妄接人僮僕裁給掃除胥吏作奸痛懲之不少貸豪猾皆聞風遠遁勸農巡阡陌問進野老爾汝相狎俾得各言疾苦歲旱修粇祀滕行者數十里涕洟洟如雨甫一年卒邑人修勸農坊以志遺愛

唐甄原名大陶字鑄萬夔州人以舉人知長子縣雅擅文學尤長於言兵蒞任以經術飾吏事著有潛書及園亭集

曹有光績溪進士知壺關縣卒於官有光性澹泊食不兼味或以苞苴竿牘進直斥之政以嚴濟寬雅符國僑武侯遺指椎埋胥篋胥斂迹卒之日圖書數卷幾無以爲斂邑童叟胥

爲流涕

于澤長山東人知長治縣性慈厚有吏才時以軍事買解草豆有賦額一兩費至八九錢者下令民間令自買自解官吏胥無得與李太守白川無後僕李國明發冢取甌石立寘於法而治其墓

李時謙淮安籍大興進士知潞城縣性抗直而有吏材嘗給牛種督力作製紡織具令嫗習女工復爲清積年通賦勤課諸生治行推潞府第一後以御史巡鹽河東入潞城名宦祠程大夏湖廣進士知黎城縣性平易兒童婦女胥得陳疾苦清潔不妄取一錢又勤其官治文書不少輟加意學校以文藝請者抉摘是非不少隱蒞任五年士習民風一變行取去邑人送者如雲後聞其卒復設位祭之

汪國興漢軍正紅旗人長治知縣在任多所創建縣右育嬰堂四門外諸義冢皆其所設也罷官後復至潞里民焚頂迎接

于元吉汶上進士長治知縣清廉慈惠決斷明敏不撓於權勢當時稱治績者推二于謂元吉與澤長也

石佳彝奉天人長子知縣清廉鯁直持正不阿捐俸倡修文峯塔尤爲縣人所述云

屠直陝西城回人進士康熙初屯留知縣性沈靜政尙仁恕隆重學校課士衡文始終不懈勸農事親行阡陌賞給酒食遇冬煮粥施衣周恤窮民立義冢置養濟院民甚德之升武定州知州

周人龍天津進士屯留知縣性仁明遇事善斷人不能蔽加

意人文多方造就值冰雹捐俸振濟民賴以安爲立碑

柳國勳河南太康人以進士知襄垣縣修葺文廟詳允完納屯糧祿米章程歲歉煮粥振濟嘗徒跣禱雨有應士民感之趙尙友南樂進士襄垣知縣歲辛丑大歉煮粥振飢親歷鄉村察訪惟恐民有失所編審甚公正

吳之錡仁和進士壺關知縣明果有幹略剔弊釐奸無所假借以內艱去唯圖書數篋邑有餽遺者悉卻之

馮雲燦金壇人以貢生知壺關縣善屬文工吟詠爲治簡靜不生事以擾民嘗有句云錯落前山影終朝在印牀可想其概矣

劉徵南昌人進士平順知縣寬厚廉明涖任六年虎不爲害平順地瘠民貧徵勸課農桑督勵紡織禁革火耗裁省安置

催科無擾決獄魁鏡招徠流移窮山無醫民有疾病施藥調治所活甚眾云

張奇抱蓋平人康熙二十二年知汾州府盡心民事明年府境汾水湫水漲溢爲災凡五載困於淹浸撫循曲至思所以拯其民者不遺餘力審視地形高下修築堤堰民立石頌之謝汝霖字用弼福建長樂舉人康熙四十年由延川令擢知永甯州興利滌弊多善政民稱清官第一然以廉直頗不得於上官州北太孝東相勤忠諸都皆磽瘠地而賦重於他都汝霖憫其窮困每歲奏銷至用已俸墊入而民不知也以未得親勘丈均賦爲憾卒於官至不能殯斂民皆巷哭失聲立專祠祀之並崇祀名宦

周祚昌字定孺三原人康熙元年以舉人知甯鄉縣赴任惟

隨一子一僕食用極淡泊而勤勞撫字民深受其澤繼任者為陳大來龍溪舉人廉儉愛民一如周云

陳之文臨川舉人孝義知縣多惠政時孝義沿舊規按里派差每有偏苦之累之文為均其里甲立碑永遵民建祠祀之任珥號希菴高密進士知石樓縣寬嚴並濟招流移復逋賦陋規加耗悉禁絕之才敏議明厯任浙江道御史長蘆鹽院張恪涇陽舉人知平遙縣性峭直慷慨誠心愛民尤重士類人不敢干以私日用胥自給無行戶邑有豪惡啞民廉知其狀立斃杖下上憲咸嘉獎之以母愛去至今人稱清廉張公莊搢武進人以進士知臨縣鎮靜不擾振興文教值奉文加派為民抗請然後酌加民不為苦擢知騰越州

金一鳳大興人知介休縣凡胥役與縣中豪強交通病民者

纖悉知之置諸法民安其業獄省訟清

黃汝鈺廣甯人知平遙縣有廉操裁決獄訟不使株連遇軍過必親送之恐或擾民

張秦孚淄川人知孝義縣有清操嚴馭胥吏而不任喜怒勤於其職早起理訟獄不違食夜漏數十下猶危坐治文書不輟邑人頌之

王埴榆林人知介休縣有善政蒞任既久於民間利病纖悉不遺驚驚各泉引渠資溉累至爭訟埴爲分別籌畫弊清而訟遂息

劉鼎文湖廣人以進士知甯鄉縣剛正嚴明甫下車吏胥爲之肅然因上下都田賦不均力爲申請積弊一清卒於官民立石以志功德



戴日巖字羅林金谿人以舉人知甯鄉縣性坦易有惠政去在既久民猶懷思之

王傑高淳人進士知平遙縣歲饑設法振濟全活甚眾革去陋規銀人稱賢良司牧行取王事累官禮科給事中

唐勳潁州人知臨縣有古循吏風值兵荒忤上官意縊於署民悲泣之

呂履恆河南新安人明尚書忠節公維祺之孫也以進士知甯鄉縣性慈恕撫羸弱尤有恩庭幾絕管卦而善治豪猾武斷舞文者胥斂迹催科自爲籍時召鄉里民參驗吏無得中飽雅工詩文能以經術飾吏治培護士類尤篤後以治行擢御史累官戶部左侍郎

韓貽豐慈谿進士知石樓縣甚有政聲擢本府同知

蕭蕙邠州人鄉舉第一知介休縣明達善斷彙強斂迹初縣人食鄰邑土鹽但銷河東之引而已既設商坐賣私販土鹽價反翔貴窮簷愁怨蕙申於臺使罷之聽民取食土鹽鹽課則按土田計戶口派入徵收歲無懸額民不擾累至今稱便官于宣字雪眉閩縣進士康熙十二年知澤州性廉潔爲政以簡靜稱軍興行間架稅調劑得中民便之更創設提調以司四門尋以撫提搆怨牽連罷官莫不惋惜州人立祠郊南置田供祀

倫可大字子受永平人知澤州寬厚爲政歷十年陽城鹽商與梟民搆難互相殺傷梟眾圍城澤人李俊奎實爲首惡遂同參將前往訪擒梟徒格拒官兵被石傷者二人巡撫聞變會知總鎮進勦可大力請止其兵曉示梟徒以次投首及被

擒止六十餘人置之法良民獲免株連立祠祀之卒以失察去官

佟國瓏字信侯遼東人康熙中由文登知縣擢知澤州屬歲大祲發常平穀借民秋成刻期輸還無爽者又爲減耗羨革陋規省徭役平物價民情大悅州城圯捐俸千金爲倡集紳民修築之引疾去官民攀號聲震郊野立生祠歲時祀弗衰其後以舊屬高平令虧帑被逮責償萬餘金澤民聞之相與憤泣公捐金投州庫久之得釋歸

白良玉梓潼舉人知高平縣有清操正供耗銀舊規寢及半良玉秒忽不多取樞書有貼備例里斂百金嚴禁之機戶受價織造官多蝕尅又由路覈驗費不貲良玉核發正價且請由縣解部機戶以甦驛馬草豆向令牙行辦理良玉檄委兩

正於秋冬平價採買民不爲病舊俗訟負者繳贖錢和者納息穀首除之又禁淹柩藏窀窆者凡一萬五千有奇高平人嘗集其治行勒諸石又請擴署舍力禁之而不能止八年行取入都貧不能舉火比卒高平列於朝者醮錢以贖乃克斂李鉅鐵嶺人高平知縣潔己愛民歲饑分廩散米民慶更生蝗蝻害稼出粟勸捕稼不爲災忽遇食殆盡鉅羅莜散種民卒賴有秋升知北勝州

張都南延津進士知陽城縣性簡厚以清廉自勵而達於土俗人情興舉胥中其以訟來者片言輒決情僞如指掌人不取欺泄官十二年清慎如一日以治行入爲監察御史梅建字啖熊普定人以舉人知高平縣性廉介精於吏治發奸摘伏不少爽建宗程書院集雋異其中時時授以文義又

立義學俾窶人子胥得誦詩書後解組去高平人建祠祀之  
項龍章字宸錫歛縣舉人知陽城縣簡重有才甫下車卽以  
潔清誓於廟終其任不渝纂縣志清編審革陋例興學造士  
不肯以傳舍視一官艱去卒於家

孫必振字臥雲諸城進士知陵川縣改建廟學創立書院校  
士督課多有舉於鄉者例解黃絲黃絹祛其累省賦歸民俗  
好訟豪猾蠹役因緣爲奸痛除之訟廷聞闐民咸樂生所修  
縣志允稱詳該職再滿遷御史去民遮道走送數百里立祠  
祀之

于繼善東阿人以歲貢任沁水縣寬嚴並用辛未縣遭蝗蝻  
請蠲積逋及逃丁之課甫半年以艱去

譚從簡山海衛人康熙元年以舉人知靈邱縣靈邱逋賦繁

累前令宋業請豁免聽遷官以去從簡蒞任雅諳民間利病百廢具舉瘡痍復舊當時謠曰前無宋憑誰種後無譚更不堪靈邱以循吏稱者二人爲最

焦恆薄雞澤人廣靈知縣安集逃民地方起色偶以聖誤左遷士民惜之祀名宦祠

何玉相濟陽人山陰知縣召民開墾荒田四百四十餘頃履畝勸課歲倍收穫屯田累民力請給軍分種邑人至今感德不衰

朱彝嘉興進士廣靈知縣秉政慈良愛民如子左遷去任人共懷思祀名宦祠

王度漢陽人以副貢知靈邱縣爲治得大體心存仁恕而能濟以嚴明吏民無敢軼繩外久而胥愛頌之以疾卒於署葛

山陰通志卷一百九 名宦金石  
韓布被敝衣數襲而已百姓罷市往哭

薛侯三原舉人知懷仁縣寬平愛民頻歲饑力請蠲免正賦  
振濟有方百姓賴以活者甚眾上官每見必稱之曰眞民父  
母分校鄉試所得皆三晉名士募民開墾荒地調任湖廣去  
民思之不置云

石佳彝奉天人懷仁知縣出金振荒給牛種又以邑近邊文  
學遜內地立義學崇異諸生見者多興起在任五年擢黃平  
知府去民樹碑識之

董學詩遼陽人懷仁知縣年少精敏待士撫民胥得治體革  
火耗清行戶立義倉飾廟學後二年歲饑勸輸以振之民無  
流逋在任三年治行爲當時最

吳一蜚字翼生蘇州人以進士授山陰知縣甫蒞任卽捐俸

修葺文廟召民開墾清出額內荒田九十三頃康熙十九年  
邑大荒詳請緩征民甚德之後累官至吏部尙書

甯朝鼎字坦園永平人由歲貢知山陰縣敏幹有治劇才多  
所修葺凡衙署學宮及各祠廟無不整飭境內一新在任十  
一年去之日百姓立碑頌德政焉

李煥斗字谷愚新淦人知廣靈縣值歲旱疫詳免絕戶錢糧  
兼額振濟一如所請民皆感頌並招徠勸墾流亡復業府倉  
捐儲米石歲令各屬運送殺虎口廣靈應運七百石煥斗力  
爲民請設法調劑通省照糧公捐其治蹟多類此

杜如鎔字又篁會稽人由校官卓異擢知馬邑縣康熙二十  
八年初蒞任值歲大饑鎔念切民瘼首倡捐振供兵雲朔事  
事裁省上檄嚴督不爲動民尤德之



秦擴曲周進士補馬邑知縣下車見井里蕭條念切痾瘵緩  
催科而急撫字喂養驛馬草豆俱出採買崇尙節儉大有布  
素之風其遇奸猾乃復裁抑之不少假借是以政平訟簡民  
獲安堵越二年捐俸倡修文廟又纂修邑志

嚴于屏金堂舉人康熙九年知遼州廉靜嚴明一介不取鋤  
強植弱吏惕民懷

沈光榮漢軍正白旗人由歲貢令河內擢知遼州甫下車卽  
詢民疾苦舊時里老人輪流支月供應苦累有至變產鬻子  
者光榮盡除之迄今蒙福鹽法議未定商不至將二載虧稅  
六百餘金自任之馭胥役嚴野無追呼及去民立碑以志遺  
愛

佟國宏滿洲正藍旗人以舉人令榆社一切陋規裁汰略盡

簿書稍暇朔爲志稿邑中文獻賴以有稽升本州知州

鄧文廣福建順昌舉人榆社知縣置學租二百石及義學五所至今士子蒙其澤

汪宗魯懷甯進士康熙六年知沁州有清操薪水悉自給民有訟以木爲皂率令自拘到案立剖之役人皆拱手無所事事由是修城隍飾廟學嚴保甲勸農桑懲游惰又爲設義冢建養濟院暇則進諸生命以詩文丹黃甲乙不倦涖官六年沁人迄今謳思之

劉民瞻字士仰遼東人以蔭生任沁州知州值戊寅己卯連被霜災詳請振濟復捐俸購粟平糶賴以全活者甚眾踰二年值牛疫貧民耕種無資出錢量給價直俾市牛他方秋成償價於官民困全蘇升平陽府同知遷知真定府祀名宦

王鼎基字美露河間進士知沁源縣素不解織下車令民栽桑飼蠶教之紡績至今賴焉勸農課士資以牛種膏火更多惠政

李琛直隸高陽人以蔭生知武鄉縣舊有飛糧爲民病琛甫受事具詳懇請豁免不允則趨會城面陳至痛哭不能止抑鬱成疾以卒縣人德之附祀明劉黃二公祠中復立專祠於姜村以祀焉

陳正樂字和菴古田舉人知沁源縣廉明渾厚政絕繁苛荒歲煮粥振饑全活甚眾

齊大岳鄜州人康熙三年以拔貢任平定州寬征賦恤刑獄招撫流亡勤綏凋弊民至今德之

張慎奉天人知平定州蒞事嚴明奸宄斂迹會文課士廣立

義學去之日民泣送之祀湧泉亭

何錫祥知平定州性嚴正泣事敏練省催科以惠民修學校以造士勸民種桑紡織祠宇多所創建

吳祚昌沐陽人由拔貢知壽陽縣樸素簡易力勤民事墾荒地撫饑民流亡漸復乃設立義學並社學五區凡有規畫悉關教養公暇補纂邑志自製恆言時爲演說有爭訟者卽令約長諭解之平焉則已嘗作牒城隍祈雨文及祭山神驅猛虎文人多傳誦

孔興範曲阜人至聖裔也以恩貢知孟縣孟城西北隅濱河舊築隄以護歲久盡圯水漲輒役民編簣寔石禦之又廟學上漏下穿丹堊漫漶興範首謁廟惕然弗甯及觀河之重爲民病也慨然曰神依於民吾知所先後矣於是庀材鳩工俸

錢胥樹佐經費不足募諸有力者不兩月築隄一百二十餘丈踰年廟功亦以次告成借諸生釋菜焉性儉嘗衣布衣出見客泣官六年寬嚴並濟孟人稱之

田國弼遼東人由貢生知壽陽縣捐俸修學請粟振饑在任多善政

蔡璜字渭侯宿遷人由拔貢知孟縣下車徧歷鄉村勤求民瘼乙亥丙子比歲不登振濟有方全活無算又仿以工代賑之例凡城闕祠宇隄堰橋梁次第修舉由是設常平以謹積儲興義學以育人才槩志乘以徵文獻皆能以儒術緣飾吏治會行取當遷職去孟人赴省乞留既不得請乃相率建生祠而立碑芹泉驛以志去思云

孫起倫安邱進士知壽陽縣以廉惠稱居三年盜弭訟清政

教大起擢戶部主事去嘗作勸戒詩各五章民傳誦之見邑人李秉銓實政紀略其後有扶風王朝用南充進士王升均以振饑爲民所德劉熙貞和曲人有功學校李敦鉅野人嘗纂縣志皆以舉人在

蔡錫祺江南繁昌人以拔貢知孟縣事下車問民疾苦稍有不便者皆蠲除之平居布衣蔬食躬行鄉里勸農勸士署中無幕客侍從數人聞如也擢刑部主事去

許嗣興漢軍鑲藍旗人康熙十八年任忻州知州留心民事耕穫時必單騎履畝勸民勤業始終不倦歲值大荒詳請賑濟復捐俸煮粥全活數千人又開渠築隄以禦水患霑利者數十村士民咸謳思之歷任福建巡撫已見蒲州重出

楊森奉天蓋平人以蔭生知定襄縣寬厚清廉舉動不苟蒞

任十五年以艱去去之日閭縣士民悲涕遮道如赤子之失慈母

黃圖昌直隸長垣人以進士知靜樂縣蒞任歲適沴饑亟議賑貨俾胥獲保聚加意學校月集諸生兩課之退食之暇稍往牒參輿論纂靜樂縣志庸昭一方文獻邑人謳思罔斁焉王時炯廣東樂會舉人知定襄縣課士勸氓輕徭薄斂於邑中典章文物尤所留意嘗增製文廟祭品建省牲所重修先賢坊楔墓碑繕南城門並濬其壕皆自爲文記之至編審丁口均平里甲重修邑乘尤其政績之卓著者

程憲奉天甯遠人蔭生康熙十七年任代州知州溫恭廉正愷悌爲懷辛酉歲饑爲食東郭日飽千餘人時樂戶誘買良家女甚多勒令自首歸還之尤愛士類建修廟學興廢舉墜

殆無虛日職滿遷戶部員外郎

梁繼祖遼東義州人由舉人任五臺縣在任十年廉隅自飭勸民開墾山荒戶口日益羨瓌之亂五臺城被攻年餘雖幸未破而輒石坍卸土垣亦大半傾圮繼祖倡捐重修乃復完整康熙十年秋大熟穀有一莖四穗者人以爲德政所致郭傑遼東人繁峙知縣遇事毅然有爲百廢具舉奉母甚孝民多化之嘗纂輯邑乘

周三進字天驥淮安山陽人康熙二十二年由拔貢任五臺縣清廉公正豈弟爲懷下車之始當地震後安集撫綏不憚勞費事有關民瘼者矻矻爲之不厭不倦如正地丁冊籍而里書絕欺隱之弊革里甲遞年而花戶省攤派之苦尤其大者北門外慮虜河齧城根爲患二十餘年築隄岸禦之工甫



輿忽夜雨河水改爲東趨不復進城人以爲仁政之所感  
張承祖平陰人以貢生在淳縣廉明爲政冰蘖自矢先是一  
切行戶俱有官價比民間平買減半值微糧耗羨加三四積  
困久矣承祖盡除之歲遭屢荒邑多盜恩威並用奸宄格心  
民立碑頌德徧鄉邑云

雒倫字彝菴武陟進士任繁峙性耿介一錢不受在官若儒  
素布衣疏食晏如也以不合于大吏挂冠而去士民惜之  
齊士莖洋縣進士任繁峙到官大修廟學節其俸之所入盡  
以佐之聚生徒講授嚴其課程文風爲之一變在職十年輕  
徭薄賦苞苴不入門以廉慎稱

李遇時字雨若奉天人康熙十四年知保德州銳意行善優  
士卹民有循吏風值陝寇煽亂大兵壓境供應芻茭民不滋

擢升岳州知府

高起鳳字鳴岡遼陽人自松滋知縣升任保德以廉介稱嘗創開北門養士愛民德意所孚知無不行歷署河曲岢嵐及西路分府俱有惠政升吏部員外郎有去思碑

唐文德字敬亭宣城人知保德州康熙三十六年

聖駕西巡駐州二日文德供事得宜奏對稱

旨嘉獎甚至蒙

賜御書一幅尋升戶部員外郎

江閩貴陽人康熙三十年以舉人知解州勤學殖有知人鑑所賞識胥登甲乙榜爲政安靜不擾士民若不知有官先是未申間民多宿逋檄一歲並徵閩詳請分年帶徵民懷之趙增汶上進士康熙五年知安邑縣徭輕賦薄政簡刑清幾

于漢吏循良祀名宦

胡心尹昌平衛舉人知芮城縣真心實政在任五年治績卓然卒于官邑人樹碑學宮前祀卜子書院

高其志商南舉人知夏縣清廉節儉愛養百姓如家人父子卒於官士民哀之各鄉建醮致祭舁櫬送歸故里

馮遵祖字青山歸安人以進士知平陸縣自奉淡泊存心慈愛修城編戶課士講約美政多端人多思其遺愛云

金焯會稽人平陸知縣歲乙亥邊事起協濟豫省轉運關中水陸騷然晝夜勤勞蒞政三載平易近人

高壽名大興進士芮城知縣值乙亥歲荒多方拯救活人甚多興利除害邑人德之升兵部主事

孫筠黃岡舉人知夏縣值乙亥歲饑驅蝗救災極盡心力貧

民就粥廠食者躬親閱給多賴以全活又以邑市官租捐作  
賓興路費緣事左遷去之日民遮道泣送

曾旭建水舉人任安邑愛民恤災吏治精勤祀名宦

張縉通海舉人安邑知縣嚴明幹練盜竊斂蹤有祠在縣東  
門外

王匡國納溪人進士知平陸縣潔己愛人噢休疾苦有古循  
吏風尤以振起斯文爲己任所拔多英異才誘掖獎勵一如  
父師以愛去民立碑志感

董之燧天長進士令平陸明敏有判斷才剖事如流案無留  
牘公餘多暇吟詠自娛內升御史民立去思碑

邵瑤無錫拔貢知芮城縣秉公編審不責羨利修舉廢墜著  
作頗多升主事去民建祠祀之

鄭純禮長樂進士政教寬平藹然儒者兩任安邑始終不渝  
內擢行人

梁迪字道始合浦進士康熙末令平陸政尚恬夷閭閻樂業  
創建虞城書院清釐更名田租以爲膏火蓋能以文學節吏  
治者也調屯留去

劉涵宣化人康熙十九年由蔭生知絳州飭廢弛抑奔競訟  
簡刑清門無私謁升戶部員外郎

王瑛字滄山武陵人由舉人宰曲沃甲午春奉檄兼攝州事  
革耗羨嚴私派編保甲靖盜賊善政縷縷甫期年而境內稱  
治去之日州人建生祠祀之

孟孔脈字祖尼富平人康熙元年以舉人任稷山知縣明於  
聽斷訟者胥心服無後言歲饑民多鬻子女獨俸贖之凡百

餘人致仕歸卒

朱尙義遼陽貢生知垣曲縣嚴革火耗盡免行戶供應陋規未踰年以艱去祀名宦

紀宏謨字伯禹開原衛人垣曲知縣嚴保甲招流亡邑中甲中之變城垣壇壝及公廡半燬於兵蒞斯土者補苴不遑宏謨力爲整飭釐然大備又蒐輯邑乘足稱掌故焉士民感德碑記之祀循良祠

崔鳴鶯內邱進士知河津縣首革現役雜派諸弊均水利正經界嚴保甲抑豪強修學建橋以次畢舉措置有方事集而民不擾外艱歸民冒風雪走上官祈留鳴鶯中夜去後數年有同姓宦過者民間傳以爲鳴鶯復至趨迎如鶯旣而知其訛皆嗟嘆久之

沈光瑀鄆縣舉人知閩喜縣創建義倉書院有自記

馬光遠山東海陽進士河津知縣興利除弊措施有序編審  
公明禦寇得法冬月過胡盧雖見民艱渡卽捐俸建橋往來  
德之

吳曰仍桐城人知絳縣秉性清正慈以御下值軍興旁午徵  
會口出昌仍委曲曉諭民無怨咨後升內閣中書

朱天爵正紅旗漢軍人知稷山縣甘澹泊蔬米胥平買馭吏  
甚嚴馬草豆舊出自民間胥給價購買客兵過境銜勒有法  
後擢都察院經歷

許自俊嘉定進士知聞喜縣携一子一僕食脫粟飯佐以青  
菜往來州郡會城策蹇而已贊上官詩綾扇外無他物用法  
平民多勸翰雅工詩文名勝地題詠殆徧尋以乞休去行李

蕭然當時稱清白吏

梁永淳容城舉人知稷山縣政尙寬和以清靜爲理尤加意士子有貧寒者必周給之於縣治前設立市廛民甚便之又開水渠以溉田至今食其利擢工部主事

陳裔振字陝棠嘉善人知絳縣年少諳練吏治聽斷平允雖見責者亦皆感服學宮傾圯急爲修之一時黌序煥然歲甲戌縣境有蝗蝻農人恐懼裔振自責爲文以祭八蜡忽風從東南起蝗悉向西北去田禾得以無恙百姓咸驚異感其德立碑以紀之

楊玉字溫如知河津縣嚴明有法度凡事期便民慮藉符之猶滋擾也民以訟至者一紙條殊書被訟名令自呼之到庭一問而決由是吏胥屏息有終其官不能得民杯酒者



王景皋奉天人聞喜知縣拊循窮黎如家人父子秉公執法  
一毫無私邑人立祠祀之

吳寶林浙江石門人知河津縣以廉潔自矢事簡民安雅意  
作人一時文風丕變

盧絳黃安舉人由教諭卓異擢知絳縣居官清正愛民如子  
縣自乙亥後災屢頻仍逋賦山積新舊並徵民甚苦之絳緩  
其催比寬以時日數年民力稍蘇悉行完納在任十七年修  
城垣建義學延師課士勸農力田政績最著嘗因旱禱雨甘  
霖立沛境有虎傷人爲文自責而祭之虎遠去士人感其德  
爲建坊以誌後擢鑾儀衛經歷去之日百姓攀轅送至平陽  
各相泣而別

許穀字詒孫常熟人以翰林庶吉士改垣曲知縣噢休疾苦

有古循吏風尤以振起斯文爲急得雋異士輒加優禮以勸由是窮鄉後進胥斲詣令君商榷文事朴斲之習一變凡平陽大小試胥贊誦垣曲文風不輟蒞任八年以憂去垣曲士民至今思之

江國棟奉天監生知聞喜縣英年精練聽斷明決鄰邑爭訟者皆相率來質革坊廂陋規大蘇民困因與王令並祀

錢元臺金垣人河津知縣蹕厲有爲決獄無留滯開書院選邑知名士課之文治斐然庚子辛丑歲大饑勸捐行賑遇劫盜嚴緝之邑境以清士民交頌

胡文煥號宣彝奉天舉人康熙四年知隰州秉性愷悌凡不  
便於民者盡爲嚴革繕贊宮修城垣葺衙舍課文藝善政甚  
多

錢以塏字蔗山嘉善人由進士累遷隰州知州催科不事敲  
扑聽訟片言立剖修學宮建紫川書院凡有關政典有益風  
化罔弗興舉性好施濟諸生貧者恆贈以資助其讀四民無  
告者多方周恤而自奉淡泊有類寒士廉惠之稱官晉土者  
莫不推重焉在任五年內遷刑部員外郎去州民泣送之

馮應泰字儀生延長人以貢生知大甯縣精詳廉介催科不  
迫遺士多方嚴束書役均勻徭銀禁羨餘無雜派弭盜賊寬  
行戶恤孤貧大都寬嚴相濟情法兩平邑人豎遺愛碑於西  
郊

吳運新貴池進士知蒲縣公廉慈惠以德化人士民感之不  
忍欺性介直不能脂韋卒以謫去去之日蒲民如失慈母老  
幼泣送者不絕於道祀名宦祠

胡必蕃孝感舉人知蒲縣葺學宮修邑乘革雜派以恤民困  
招流移以實田疇稱賢令焉遷官去

梅錫字銅巖宣城進士知大甯縣嚴取舍遇事洞見本末雖  
黠猾者不能眩厲精治簿書有爭訟者以片言折之而不喜  
施鞭朴多委曲開導令去馭吏胥獨嚴嘗誡曰百姓一杯水  
汝輩無得妄受也後累官左都御史

朱元洽嘉定進士知蒲縣以民力凋敝極意培養蠲免墾荒  
虛課七百餘兩事凡八上而後得請修學宮培風氣雅意作  
人成就甚多文章政事卓然爲三晉最祀名宦

查振宗奉天人康熙十一年知霍州泄霍五載盜賊遁跡流  
離復業給牛種勸耕稼供應大兵省費甚多

黃復生黃岡人由選貢知霍州革陋規行保甲修州志輿論

翁然

葉九思奉天人由通判擢知霍州寬宏明敏設義學以恤單  
寒立鄉約以警頑懦鑄鐵牌而賭博息嚴保甲而盜賊甯搆

大同知府

李紹祖長白人霍州知州性剛直不為勢要人屈涖官廉民  
胥德之遷潞安府知府會

聖祖仁皇帝巡晉代者未至留辦理公務為一內員所窘紹祖

自刎死霍人號泣詣 闕陳訴

聖祖大怒立命巡撫監內員赴霍梟示霍人呼萬歲聲震山谷  
及喪出商民胥罷市輓歸奠道旁者趾相續復建祠中鎮廟  
歲時肅祀不絕

呂維翰字松若益都進士知趙城縣百廢具舉獄犴悉空敦

崇學校士氣騰奮築東園西園二別館與邑之賢士大夫考  
論經史並著別紀以補邑志之未備

侯榮圭濟源舉人知靈石縣修隄堰清穰城厥功懋焉民有  
召杜之謠

徐容海鹽進士知趙城縣省刑輕耗修學課士卓異升邠州  
知州去之日父老車衣泣送立祠以祀

右康熙年一百八十九人

附見六人